



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Assam deputy speaker Momin-i tweet asüba atema ashishiteper

Russia PM-i Pacific nung asetkong kar semdang

VOL. XVIII NO. 283 (ADOK 283) DIMAPUR SANGTENNÜ (TUESDAY) CHITENI (JULY) 27, 2021 ₹ 5.00



Nagaland Soil & Water conservation aser Geology & Mining Minister V Kashiho Sangtam-i New Delhi nung Union Minister of Ports, Shipping and Waterways & Ministry of AYUSH Sarbananda Sonowal den ajurutepdang agiba noksa angur. Iba mapang Kashiho-i Union Minister Sonowal dang North East nungeri aginüba ama Union Cabinet nung züngsema atema tenüngsang agütsü aser Nagaland dak sendakba onüktem den River Dredging indang tebilembatem lemsatep ta Nagaland House, New Delhi. Pro (IPR) Kuolie Mere-i sangdong ka nung ashi.

NPF-i Opposition maliba sorkar indang jangjatsür

Dimapur, July 26, 2021 (TYO): NPF Legislature Party-i Nagaland nung Opposition maliba sorkar pusemtepsü atema telemteba agiba nung tatemzükba kecha mali aser PDA sorkar nem takhangba kecha magütsü, ta NPF Legislature Party tanü metetdaksüogo.

Indo-Naga yimjung maparen nung yaritepsü aser talisa Naga yimten teloktem longjemdaksütsü atema Naga nungeri MLA 60 prongla longjemtsü sarasadema aru. Naga nunger aser India sorkar tsüngda terata ajak agientsü

atema MLA ajak longjemdaksünüa liasü. Iba tangatetba nung ajemdaker NPF Legislature Party-i Opposition maliba sorkar ka akümtepsü telemteba agiogo, ta NPF Legislature Party Secretary, Dr. Chumben Murry-i sangdong nung ashi.

Anungji, olemtepsü nung adenba Naga nunger teloktem aser Political party ajak dena Centre sorkari tekaratiba nung Indo-Naga yimjung maparen tembangtsü atema nendaka inyaksü mepishir, ta NPF Legislature Party-isa metetdaksüogo.

Peren nung NSCN (IM) indang mess 2 shibangtsü

Peren, July 26, 2021 (TYO): Peren district nung sepaitemi NSCN (IM) pur chiyungba tesem ana shibangtsüogo.

Jalukie kübok Midland colony nung ozüngi memelaba chiyungdak anaji shibangtsü, ta PRO HQ IGAR (N)-i ashi.

July 19, 2021 nü sepaitemi NSCN-IM indang mess ana mita ao aser idangji prangpong-injangtem aser taitüsü aketba kulikaketem angu, ta PRO-isa metetdaksü.

Iba sülen July 22, 2021 nü

sepaitem, civil administration, CSOs, police aser yimtsüng ketdangsurtem lia Midland colony nung mess anaji shibangtsüogo ta paisa ashi.

NSCN (IM) ketdangsurtemi parnok military wing züngsemtem designated camps adena moudaksütsüla ta PRO-isa metetdaksüogo.

Külen, yimtsüng ketdangsurtemia public dang pei kidang ozüngi memelaba mapa meinyakdaksütsü mepishia metetdaksü.

Mirabai Chanu nem Additional SP mapa agütsür; La Delhi tongogo

Imphal/New Delhi, July 26, 2021 (Agencies): Hombarnü Manipur Chief Minister N Biren Singh-i Saikhom Mirabai Chanu nem Additional Superintendent of Police mapa agütsüba osang metetdaksüogo.

Tokyo Olympics nung Mirabai-i Silver medal takok angu aser iba atema state sorkarisa la nem Rs 1 crore senpet agütsütsü, ta chief minister Biren-i ashi.

Mirabai nem Additional Superintendent of Police (Sports) mapa agütsür, ta paisa ashi.

Manipur sorkarisa state nung kobi melii world-class weightlifting academy ka lapoktsü telemteba agiogo, ta chief minister-i metetdaksü.

Tokyo Olympics nung Judoka L Sushila Devi constable nungi sub-

inspector menden nung ajungkettsü aser Tokyo Olympics nung shilem agir shia nem Rs 25 lakh agütsütsü, ta Biren Singh-isa ashi.

Tokyo Olympics nung Manipur nungi saisaponger pungui shilem agir.

Hombarnü Mirabai Chanu Delhi tonga aruogo aser la tayimtsü anendak atongba sülen RT-PCR test agia liasü.

India-i küm 21 tashi Olympics nung weightlifting medal ka danga mengutet aruba sülen taküm Tokyo Olympics nung tetsür 49kg category nung Mirabai-i silver medal ngutetogo.

Taneparishi küm 26 tain Mirabai-i Twitter nung "Kidangi meyipa aoer. Kü taküm nung mapang tajung ajuruba atema Tokyo 2020 dang kanga pelar" ta metetdakja liasü.

Assam aser Mizoram arrtsülen tensa mejungi kümogo Assam Police 6 asü; Union Home minister tebang aiter

New Delhi/Guwahati, July 26, 2021

(Agencies): Hombarnü Assam-Mizoram arrtsülen mangatettep adoka tensa tamajung akümbsa sülen Union Home minister Amit Shah-i state anaprong nung chief minister tem dang tensa süngjemdaksütsü atema tetuyuba agütsüogo.

Tanü atalokba lendong nung Assam police 6 tashi taküm samaogo, ta Assam Chief Minister Himanta Biswa Sarma-i metetdaksü.

Ashishitep aketba tesem ya Assam kübok Cachar district aser Mizoram kübok Kolasib district anasa lir aser tanü injang aika khadok aser nisungtemi sorkar garitem amak.

Mizoram Home Minister-i taonung sangdong ka nung tanü atalokba indang osang metetdaksüogo.

Pai ashiba agi, tanep 11:30 ako meta Assam Police IGP-i anir Assam armed Police 200 shi ka Vairengte Auto-rickshaw stand-i aru aser parnok tashiyim agi CRPF aser Mizoram police indang duty post ana ajanga süi. Iba mapang Assam Police-i National Highway nung senzüba gari kar raksatsü.

Assam Police-i tashiyim mapa inyakba osang angashiba sülen

Kolasib District kübok Vairengte jila nung alirtemi osang metetpelatsü atema tesem tonga ao saka Assam Police-i parnok züka merenshi aser idangji nisung aika yiru, ta paisa ashi.

SP, Kolasib aser Executive Magistrate nungertemi tesem tonga oa tensa süngjemdaksütsü merang saka Assam ketdangsurtemi tekong meranga noktak aser Mizoram Police dak tenük amdaktsüba mozü aser grenades pokloktüsü. Iba sülen nikongdang 4:30 ako meta Assam tsütsü nungi injang khaloktsü, ta Home Minister-isa metetdaksü.

SP, Kolasib District-i CRPF duty camp nung Assam Police ketdangsurtem den tejembidak nung Assam Police-i injang khaloktsü aser iba jagi Mizoram Police-i meyiper injang khaloktsü, ta paisa ashi.

Iba tatalokba atema tanü Assam aser Mizoram chief minister ana Twitter nung kanga dang mejungi o toktepa liasü aser tenaprongi Amit Shah den jemi. Iba mapang Shah-i tiyongtsü ia ken o angatettepsü nangzük.

Assam-Mizoram arrtsülen injang khadokba aser tensa raksaba osang angashiba sülen Assam chief

minister Himanta Biswa Sarma-i Twitter nung tebilemtepsü abenba lemsatep.

Mejangjaba nisung kari arrtsülen tensa raksatsür ta ser Sarma-i video ka sayu. Tanü anüngdang Sarma-isa Assam-Mizoram arrtsülen Assam Police trok tashi taküm samaogo ta osang sangoktsü.

Külen, Mizoram CM Zoramthanga-i Assam sorkari Mizoram lushii aru aser tashiyim amshi ta tai tongloktüsü.

"Anatsülen nisung taküm samaba ya matalokla. CRPF nem arrtsü nung duty post agütsüogo aser Assam sorkaria ken o angatettepsü atema tensa süngjemdaksütsü imlar" ta Zoramthanga-isa ashi.

Mizoram CM Zoramthanga-isa Assam kübok Cachar adena aruba apuani na dak tashiyim mapa inyakba indang video ka sayu.

"Cachar ajanga Mizoram-i aruba tai maket apuani na dak tashiyim mapa inyak. Nenoki iba mapa tamajung inyakba atema nenok metentsü indang kuli kechi agütsütsü?" ta Zoramthanga-isa asüngdang.

(Maneni tapak 2 nung...)

COVID-19 Nagaland: 54 dak putet, 78 taneptsü angu & 3 asü

Kohima, July 26, 2021 (TYO): Hombarnü Nagaland nung nisung 54 dak COVID-19 putet aser 78 taneptsü angu.

"Tanü nisung 54 dak COVID-19 putet. Parnokji Mokokchung nung 19, Dimapur nung 15, Kohima nung 11, Tuensang nung 4, Peren nung 3 aser Mon o Phek nung kaka (1) lir. Parnok züngsema nisung ajak agi 27,362 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Hombarnü COVID-19 puteta alir nisung 78 taneptsü angu.

Parnokji Dimapur nung 31, Longleng o Mokokchung nung ter kaka (11), Phek nung 7, Kiphire nung 5, Tuensang, Kohima o Peren

nung pezüzü (4) aser Mon nung 1 lir. Parnok züngsema nisung 24,793 taneptsü nguogo" ta paisa metetdaksü.

Nagaland nung COVID-19 nungi taneptsü angurji 90.61% lir aser tang nisung 1,256 anepaludar, ta Dr Kikon-isa ashi.

"Tanü COVID-19 puteta alir nisung 3 asü. Tasürtemji Dimapur nung ana aser Mokokchung nung ka liasü. Tanü asürtem züngsema nisung 545 süogo saka nisung 14 bo tanga tashidak ajanga asü" ta paisa metetdaksü.

Nagaland nung COVID-19 alitsü akok ta temolung melemi bilemba sample 256,148 tendangogo. RT-PCR ajanga 101,821, TrueNat ajanga 66,848 aser Rapid Antigen Test

ajanga 87,479 tendang, ta Dr Kikon-isa ashi.

"Deobar tashi nung nisung 597,327 nem COVID-19 vaccine indang dose 735,742 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,680, healthcare workers 15,952, arishi küm 45 ser tempapur 181,110 aser arishi küm 18 nungi 44 tsüngda alir 339,585 lir" ta paisa ashi.

"Vaccine agirtem rongnungi nisung 138,415-i dose anaprong agiogo. Parnokji frontline workers 37,805, healthcare workers 12,173, arishi küm 45 ser tempapur 88,160 aser arishi küm 18 nungi 44 tsüngda alir 277 lir" ta Dr Thurr-isa ashi.

Delhi nung tenla ki raksatsüba atema ola adoktsüla: NPCC

Dimapur, July 26, 2021 (TYO): July 12, 2021 nü South Delhi nung aliba Little Flower Church raksatsü aser iba mapang Delhi CM Arvind Kejriwal-i temeten agütsütsü ta nangzükba liasü saka tesülen pai iba onük atema Centre dak ang tai tongloktür, ta NPCC President, K. Therie-i ashi.

Delhi CM Kejriwal-i DDA aser NDMC ta Centre sorkar kübok lir ta ashir aser ano külen PM Modi-i Delhi nung tenla ki raksatsüba memetet ta ashir.

Delhi nung tenla ki raksatsüba atema India nung Khristan state tem

asir talisa Nagaland nung alirtemi ola adoktsü akok ta bilem, saka tang tashi ola madoker, ta K. Therie-isa ashi.

NBCC-i Nagaland Khrista asoshi ta yimiyim agütsüba kübok asenok ajak züngsema lir aser iba ya Khrista atema bendanga agütsütsü renema ataba tenangzükba ka lir. Saka tenla ki raksatsüdag ola madokbaji iba Yisu dak amanger Khristantemi Khristan pur reshikangshiba sorkar ka pusembaji Farisi nungertem lir, paisa metetdaksü.

Nagaland-i Hindutva marutsü ta

yimtenren lennir kari jembiba ni angashioogo aser parnok atemabo tanga state tem nung Khristantem reshikangshiba ya kecha masü ta züngshir ama bilemer. Linük nung Hindutva den külemi yimtenren tashi amshiba ajanga tamangba yimsü tsütsü tepila tulu adokdaksüogo aser iba ya Khristanpurtem den nübo agi tangar memeneperitem atema lendong lir. Nagaland-ia tenla ki raksatsüba aser Khristantem reshikangshiba atema ola madokba atema kanga süngmanger, ta NPCC president-isa ashi.

Covid-19 tashidak nokdangtsü atema senso shia teinyaktsü asem :



Tir Yimiyim

Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Industries & Commerce department pur senden amen

Dimapur, Chiteni/July 26 (TYO): Department of Industries & Commerce pur shisadokten senden ka July 22, 2021 nü Directorate of Industries & Commerce indang Conference Hall nung mena liasü. Advisor, Industries & Commerce and Employment, Skill Development & Entrepreneurship, Imnatiba Jamir ajanga iba senden nung jembiba mapang, state sorkar aser state nung sendaktepa aliba department aser Central Ministry

balala indang sentongtem den lirumedema entrepreneurs aser industrialists tem lenmang tajungba nung ajangzüksü asoshi tekeratiba nung Nagaland Trade, Investment and Industrial Policy (NTIIP) mapa kuma inyaksü atema shia liasü. Danga state tem den Nagaland lirumedemsü asoshi department indang sentong balala inyakyim melenshitsu atema pai department nung ketdangsurtem ayongzuka liasü. Iba senden nung ketdangsur

balalai MSME Projects, Startup, PMEGP, Food Processing, Handloom & Handicraft, Border Trades, Ease of Doing Business (EoDB) NEIDS amala tang department ajanga teinyakdak mapa indang osang agüja liasü. Kasa senden nung takok anguba, tebilemstü khuret aser tetsükdaktsü ajuruba onüktem lemsatepa liasü. Iba senden nung IPOs, Commissioner & Secretary, Industries & Commerce, Kekhrievor Kevichusa dena liasü.

C-CAMP ajanga DHD nem Oxygen concentrator agütsü

Dimapur, Chiteni/July 26 (TYO): Centre for Cellular and Molecular Platforms (C-CAMP) ajanga Cooperate Social Responsibility (CSR) nung shilem ka ama District Hospital Dimapur (DHD) nem internationally certified oxygen concentrator tejang tenem (50) agüja liasü, koba Medical Superintendent, DHD ajanga July 25, 2021 nü agizuka liasü. Linük tesem balala nung nübur takum kumzüksü asoshi mozüki indang osettsüset aser

ki-o-jen tajungba kumdaktsütsü nükjidong nung C-CAMP ajanga inyaker. C-CAMP ya Biotechnology, Government of India, Ministry of Science Technology, Government of India, NITI Aayog-AIM, Ministry of Electronics and Information Technology, Government of India aser Department of IT, BT, S&T, Government of Karnataka ajanga yariba Centre ka lir. Ibai India nung life science

innovation, technology aser entrepreneurship indang tesep tongtipang ka lir. C-CAMP yagi indang-indanga senotsü teyari agüja tesüiba küm ishika tsüngta start-ups 200 dak tema yariogo aser parnok ya healthcare, agritech, cleantech aser biotech tsütsü start-up aser innovator 200 dak tema den sendaktepa lir. District Hospital Dimapur nem iba oset ya Rhenus Logistic ajanga tekeratiba nung aser jenjang tajemba nung bener aruja liasü.

Longleng nung HSLC & HSSLC tatidang nung takok angur tetsürtem tushi

Dimapur, Chiteni/July 26 (TYO): Tawa sangdongba High School Leaving Certificate (HSLC) aser Higher Secondary School Leaving Certificate (HSSLC) 2021 tatidang nung Longleng district nungi temaba jenjang ngutetba tetsürtem nem konang tetushi agütsüba sentong ka district administration aser Mahila Shakti Kendra, Longleng ajanga Deputy Commissioner, Longleng indang Conference Hall nung "Beti Bachao Beti Padhao" sentong kübok July 24,

2021 nü ayongzuka agia liasü. Iba sentong nung Deputy Commissioner, Longleng, M.Shayung Phom-i o tatsüka jembiba mapang kaketshirtem dang meranga azüngtsü aser takum nung nükjidong ayutsü ajungshia liasü. Tetsür nem tali temolung agüja shisaliok agütsütsü asoshi pai jembiba aser takok tajung ngutettsüsa tesayurtemi shilem agiba asoshi pelaba lemsatepa liasü. Education Secretary PSC,

Longleng, Purtoshi ajanga sentong nung takok anguba kaketshirtem den tepela lemsatepa liasü. Iba sentong nung SDO (C) Longleng, Trongdiba Sangtam ajanga jembiba mapang BBBP sentong indang rateta shia liasü. Iba mapang Longleng district kübok jenjang balala nung takok angur tetsür 34 nem senpet den kuli kakat agüja liasü. Iba sentong nung WWO MSK Longleng, Phungla Phom menden liasü.

Assam aser Mizoram arrtsülen...

Paisa mejangjaba nisung kari süng bener sepaitem den raratepba indang video ka sayu. Assam Police indang company ana den civilian aikati Mizoram kübok Vairengte auto rickshaw stand nung nisung amak aser tenük amdaktsüba mozü amshi ta Zoramthanga-isa metetdaktsü. Külén, Assam police-ia ashiba agi, Hombarnü Cachar district nung mejangjatetba nisung kari parnok dak lung agi aondang police aika yiru. Lailapur nung nisung kari Assam Police dak süng aser yintem agi azük ta iba tesem nung alirtemia ashi. Zoramthanga-isa Sarma dang

Vairengte nungi Assam Police anientsü metetdaktsüogo. Assam Police-i Vairengte nungi kilometer 5 shi pilar 'Aitlang hnar' ta ser tesem ka atsünga agiba sülen Mizoram aser Assam tsüngda arrtsü mangatetep tuluba aküm. Mizoram-i Assamese nunger ali atsünga agir ta Assam Police-i tai tongloksür aser July 10 nü parnoki 'eviction drive' ka agia liasü. Ajisüaka, iba anogo Assam ketdangsurtem dak nisung kari grenade ka mereplokja pokdaktsü. **Assam Congress-i BJP CM tem raraba menütsür** Tanü Assam aser Mizoram chief minister ana Twitter nung

(TAPAK 1 NUNGI...) o toktepba ya temenünütsüka lir, ta Assam Pradesh Congress Committee (APCC)-i metetdaktsü. "Union Home Minister Amit Shah-i Northeast toktsür aoba sülen anogo ka lir BJP-i aniba National Democratic Alliance (NDA) nung adenba chief minister ana yimjak nung toktepba ya public atema tebilemstü khuret tulu ka lir aser iba denji temenünütsüka lir" ta APCC General Secretary aser Media Chairperson, Bobbeeta Sharma-i ashi. "BJP sorkari Twitter handles aser social media ajanga lintük yimsü asür ama lir" ta Bobbeeta Sharma-isa lutsü.

13th NLA indang Session ti buba atema sentong yangluogo

Dimapur, Chiteni/July 26 (TYO): Nagaland Legislative Assembly indang Speaker, Sharingain Longkumer mendenpuba sür Business Advisory Committee senden July 23, 2021 nü Assembly Committee Room nung mena 13th Nagaland Legislative Assembly indang Session ti buba atema sentong tarensen yanglua liasü. August 3 nungi August 5, 2021 tashi agitsü aliba Session ti buba mapang inyaksangshitsu atema Committee ajaga jembiba. Iba Session nung tsünglanglen agüja aliba Business tem inyaksü:

1. Obituary references
2. Questions
3. Laying of Report
4. Presentation of Assembly Committee Reports
5. Introduction of Government Bill
6. Consideration and Passing of Government Bill
7. Discussion on Matters of Urgent Public Importance
8. Introduction and Adoption of Government Resolution, if any
9. Announcement of the revised composition of the various financial and non- financial Committees

10. Unfinished Business, if any
 11. Adjournment of the Session sine- die
- CALENDAR OF SITTING**
03-08-2021 TUESDAY
1. Obituary References
 2. Questions
 3. Reporting on Assent to Bills
 4. Laying of Report
 5. Introduction of Government Bill
 6. Discussion on Matters of Urgent Public Importance - Naga Political Issue.
 7. Introduction of Government Resolution, if any
- 04-08-2021 WEDNESDAY**
RECESS
- 05-08-2021 THURSDAY**
1. Questions
 2. Presentation of the Assembly Committee Reports
 3. Discussion on Matters of Urgent Public Importance
 4. Consideration and Passing of Government Bill
 5. Consideration and Adoption of Government Resolution
 6. Announcement of the Revised Composition of the various financial and non-financial Committees
 7. Unfinished Business, if any
 8. Adjournment of the Session Sine- die.

Wokha DTF senden nung COVID-19 atema mera balala agitsü jembiba

Dimapur, Chiteni/July 26 (TYO): Wokha District Task Force for COVID-19 pur senden ka Deputy Commissioner, Wokha indang Conference Hall nung July 22, 2021 nü mena liasü. COVID-19 tashidak wara ketdangsuba dak sendakba nung rangloker jembiba mapang ADC ajanga healthcare worker/frontline worker aser nüburtem tsüngta COVID-19 tashidak tendangba aser mozü agiba atema timi amaliteptsü aser tajungtiba nung tongla-tongsüngtsü kanga tongtipang, ta ashi.

War room nungi mapang shidak nung osangtsüsang prokshitsü mechi Colony Council Chairmen aser danga frontline worker tem ajak sentpa WhatsApp group ka lapoktsü lemteta liasü. COVID-19 tendangba aser mozü agiba dak sendakba nung nüburtem molungjang nungi tetsübu samadaktsütsü asoshi awareness agütsütsü atema COVID-19 tendangba aser mozü agiba tajangzük indang IEC yanglua Colony Chairman tem ajanga prokshitsü lemteta liasü. Iba dak sendakba nung CMO aser DPRO nem mapa nungloksü. Wokha District Task Force for COVID-19 nung mendenpubai Wokha Town Colonies Union indang tir dang, COVID-19 dak sendakba mapa tem tajungtiba nung inyaksü aser tsüngsü apuba maparen nung frontline worker den yariteptsü atema colony ajanga indang chairman den senden amentsü ajungshia liasü.

Nüburtem nem timtem magütsütsü mechi July 27, 2021 nungi tenzüka Dr. Mhondamo Memorial District Hospital melena Mt. Tiya Hall nung random testing booth amenoktsü, ta Chief Medical Officer, Wokha, Dr. C.W.Tungo-i ashi. CMO-i colony chairman ajanga dang mozü magi alirtem indang data agütsütsü ajungshi, aser iba nung ajemdaker mozü agütsüba maparen tenzütsü, ta ashi. Wokha jila kübok aliba colony ajanga nung tapi agi COVID-19 tendangtsü iba senden nung lemtet. School/pre-school kar nung school agiba osang aruba nung ajemdaker jembiba mapang colony chairman tem dang kanga junga mita repringshima atatsü aser SOP nung aibelenba school tem indang osang DTF nem osang agütsütsü nungloksü. COVID-19 agi kongshia aliba kibongtem nem temolung tali agütsütsü aser temolung uludaktsütsü mechi home isolation nung alir ajanga dang anogo ananü nung khi bo jembitsü lemtet. Home isolation nung aliba kibingtemi teyari balala atema Wokha DTF indang helpline number nung jembitsüla, ta senden nung nenshia jembia liasü. Iba dak sendakba nung helpline number ya colony chairman temi lemsateptsü lemtet. Iba senden nung ADC (Hq) Wokha, T. Lankonsen Tsanglao menden liasü, kong WDCCI lenirtem aser Wokha jila kübok colony council chairman tem dena liasü.



Mokokchung town tiyong Imlong Place nung medical department ajanga dokan nung amenertem Covid-19 tendangba mapang tangokba noksa nung angur. Iba tetandangba ya anogo ishinü Mokokchung town tesem balala nung agiyonga aotsü sentong aliba angazüker. Mokokchung, July 26, 2021

Happy Birthday

TENÜNG : MESO LONGCHAR

Tasoba anogo : July 27

Talidak : Chumukedima, New Colony, Ward 9

Na kinü tanur ka dang aser naibo kecha memetettsü saka onoki na asoba anogo kanga dang longsoa aser meraketa amonger. Na iba alimai arur küm ka ajungba anogo tepela salem tulu abener.

-Na meimertem.



Tripura nung arishi küm 105 tain tantsür Tara Kanya Debbarma-i tawa tu Covid-19 vaccine agi aser Hombarnü Tripura chief minister Biplab Kumar Deb-i la den ajurutepogo. Tanü Chief minister Deb-i Gomati district nung Brahmachhera yim tonga ao aser Tara Kanya den ajurutepa mapang tatsüka sensaksema liasü. (Agartala, July 26)

Assam deputy speaker Momin-i tweet asüba atema ashishiteper

Guwahati, July 26, 2021 (Agencies): Assam Legislative Assembly nung deputy speaker aser Bokajan LAC nungi Bharatiya Janata Party (BJP) MLA, Numal Momin-i Twitter nung osang ka sangoktsüba atema aitsür.

Manipur tsür Mirabai Chanu-i Olympics nung takok anguba sülen "NE aser tanungba India tsüingda. #Olympics NE-i takok nguogo" ta Numal Momin-i metetdaksü.

Ajisüaka, iba osang ya nisung aikati magizüker aser parnok Momin aitsür.

"Pai ashiba o ji tamajungleni meyipsa mejembitsüla saka pai olen tajung agi shitetsüba liasü. Sorkar akümba national party ka nungi züingsem kati yamai mejembitsüla. Iba ya meshitak lir" ta Arunachal Pradesh nung Pasighat West MLA & Congress züingsem Ninong Ering-i ashi.

Aiben Northeast ya senzüka yutsür saka union cabinet nung Northeast nungi union minister

2 aser Minister of State (Mos) 3 shimokba ya tajangzük tuluka lir, ta paisa ashi.

YouTuber kari 'Chinese' ta ajaba atema taoba mapang MLA Ninong Ering tenüing tetshio.

Ninong Ering kin nung ajemdaker aitsüba sülen northeast ajungalen social media nung nisungtemi iba inyakyim aitsü aser national-level school textbooks nung Northeastern region indang tapak dendaktsüsü atema takhangba agütsüshitsü tenzüka liasü.

"Momin-i tweet asüba ajanga Northeast-i India nungi nüjiso aginür ama angatetsü. Tsüingda (versus) ta asüba olen ya meinok tajungba süla" ta Nazira Congress MLA Debabrata Saikia-ia ashi.

"Northeast ajanga India ajunga atema konang bentsür arutsür mesüra iba mesükba olen ka zülutsüba liasü. Osang post asüding kanga kümdangtsüla" ta paisa metetdaksü.

"Nisung ajaki lutsütsü temeten lir. Kodaser parnok noktangtetsü? Ni saisaponger tangatetba nung iba olen zülü aser Olympics tetshia lir. Nisungtemi saisapong nung politics dendaktsür" ta deputy speaker Numal Momin-i ashi.

"Saisapong nung 'versus' ya teti jembiba olung ka lir. Northeast India nungi asü nung ni la atema nüma atanger. Iba nung tai kecha mali. Ni kechi shiogo ibaji shitak dang aser India nungi balaka razüka aotsü indang kecha mashir. Nisungtemi ashishiteper süra ibaji parnok tangatetba lir" ta paisa ashi.

Olympic tenzüker Numal Momin dak sendakba nung tang agi tanabenbuba ashishitep onük adokogo.

Indian wrestler Priya Malik-i Olympics nung gold medal angur ta taila osang ka prokshiba sülen Numal Momin-i Twitter nung la nem tenüingsang agütsü saka tatsüka lir iba tweet ji agiena liasü.

Independence Day nung Hollongi Airport lapoktsü

Itanagar, July 26, 2021 (Agencies): India nunger nüjiso ngur küm 75 ajungba anogomung August 15, 2021 nung Arunachal Pradesh state nung kanga dang yongya ataba 'Hollongi Airport' lapoktsü.

Deobar aonung tesü Arunachal Pradesh chief minister Pema Khandu-i iba osang metetdaksü.

Hollongi Airport mapang shitak nung lapoktetsü atema mapa ajak inyakdar. Iba airport

runway maparen tatemlen kati arudar aser August 15 matongdang airport nung maparen ajak tembanga inyaktsü imlar, ta paisa ashi.

Social media nung Arunachal Pradesh chief minister-i, "Itanagar nung Hollongi Airport renemtsü asoshi maparen kara inyakdar. India indang 75 buba Independence Day anogomung nung iba Airport lapoktsü," ta lemsatetp.

Hectare 320 shi ayimjema iba airport yangludat. Iba Greenfield

Airport lapokba sülen mezüing phase nung tayimtsü tilatem, talisa Airbus A321 amala anenzüktsü akok.

India atema Hollongi airport ya kanga tongtibang asütsü aser airport dak sendakba feature balala agütsütsü sentong lir.

Tayimtsü tilatem anenzüktsü atema mezüing phase nung metre 2,300 shi runway ka yanglutsü aser iba sülen tayimtsü tulu anenzüktsü atema iba runway metre 2,800 tashi atsülangtsü.



Deobarnü Meghalaya nung kaketshir aser lanur teloktemi Union Home Minister Amit Shah anema lungkak ait aser pa mesüka yanglur mi agi rongdok. Amit Shah-i Meghalaya semdangba mapang inner line permit (ILP) indang kecha mejembiba atema tejashi sayua Garo Students Union (GSU) aser Achik Youth Welfare Organization (AYWO) züingsemtemi Chief Minister indang office jakdang adenshir lungkak aita liasü.

Lalapur outpost nung Assam police 7 yiru

Aizawl, July 26, 2021 (Agencies): Hombarnü Mizoram nungi mejangjaba nisung kari Assam kübok Cachar district police post nung injang khaloktsüba mapang Assam Police constable 7 yiru.

Nisungtem jagi Cachar district kübok Lalapur nung APBN temi anükba border outpost amak.

Osang angazükba agi, iba lendong nung Cachar Deputy Commissioner indang convoy nung gari ka raksatsü.

Iba arrtsü tesem nung Mizoram nungeri azü agi yangluba alu jen 8 tashi Assam police-i raksatsüba sülen ghonda ishika lir iba lendong atalok.

Deobarnü Shillong nung senden ka agiba mapang Union

home minister Amit Shah-i Northeast state tsüingda arrtsü mangatetep ken o indang jembia liasü.

Mizoram chief minister Zoramthanga-i, state ana tsüingda arrtsü mangatetep adokba dak sendakba nung telemetba ka agütsütsü asoshi Union home minister Amit Shah dang mepishi.

Zoramthanga-i Twitter nung state ana tsüingda arrtsü mechi mangatetep adoka raratepba indang video ka lemsatetp aser Home Minister Shah dang telemetba ka agütsütsü asoshi pai mepishia liasü.

Assam Police-i ashiba agi Mizoram nungi nisung tamajung telok tulu kati police dak lung agi aon.

Mizoram nung nisung 1369 dak Covid-19 putet

Aizawl, July 26, 2021 (Agencies): Mizoram state nung tanü ya otsütsütsü anogo ka ajuruogo aser ibaji nisung teimtiba dak Covid-19 putetba lir.

Tesüiba ghonda 24 tsüingda Mizoram nung nisung 1369 dak Covid-19 puteta liasü.

Tashidak tasen puteter densema state nung iba tashidak puteter nisung 33,452 tashi kümogo. Tang Mizoram nung nisung 9743 Covid agi shiranga anepaludar.

Mizoram nung tesüsa Covid-19 puteter rongnung Rapid Antigen Test ajanga nisung 1355 aser TrueNat tests ajanga nisung 14 putet. Tang Aizawl nung Covid wara agi shiranger teimtiba lir. Aizawl nung nisung 7006 anepaludar

aser iba sülen Lunglei - 914 aser Kolasib - 667 lir.

Ano külen, tesüiba ghonda 24 tsüingda COVID-19 agi shiranger ka asü. State nung iba tesashi wara ajanga taküm samar nisung 137 kümogo.

Tawa tashi Mizoram nung kanga dang tesashi Covid-19 variant asem tashi putetogo. Itemji Delta variant, Eta variant aser Alpha variant lir.

Hokolbarnü, Mizoram sorkari Aizawl Municipal Corporation (AMC) nung July 31 tashi total lockdown atsülangogo. Iba tesem nung Covid-19 tashidak puteter teimba küma aoba aser nübur ajak Covid-19 tendangtsü nükjiding nung total lockdown atsülangtsü telemetba agi.

Office of the NAGA STUDENTS' UNION, DELHI
Motto: Strength in Unity
29, Dr. A.P.J. Abdul Kalam Road, Nagaland House, New Delhi-110011
Email: nsudoffice1963@gmail.com Website: www.nsud.org

+91-812-094-6202
+91-781-874-7717

NOTIFICATION

The University of Delhi has announced the commencement of admissions for Undergraduate, Postgraduate and M.Phil/Ph.D Programmes for the academic session 2021-2022. Therefore, all the eligible applicants are informed that the registration process of all the programmes will be completely done online for all categories and quotas. The given dates of registration for the various programmes are as follow:

REGISTRATION SCHEDULE:

Programmes	Commencement Date	Last Date
Post Graduate Programmes	July 26, 2021	August 21, 2021
M.Phil/Ph.D Programmes	July 26, 2021	August 21, 2021
Under-Graduate Programmes	August 2, 2021	August 31, 2021

The candidates who wish to consider for admission of various courses in different colleges of the University are required to register online at www.du.ac.in

Naga Students' Union, Delhi admission helpdesk will be available at Nagaland House and Manipur Bhawan New Delhi starting from 26th July 2021 to assist the Naga students and others in filling up their forms and in the admission procedures till the end of the admission. For further information and queries, the concerned parents/candidates may contact any of the NSUD Office Bearers.

NSUD EXECUTIVE COUNCIL 2021-2022

NAME	DESIGNATION	CONTACT
Isaac Charenamai	President	+91 7838267717
Dalounii Angam	Vice President	+91 7827788251
Vitso Rio	General Secretary	+91 7005045790
T Raisung	Assistant General Secretary	+91 8750321061
Kelhusilie Nagi	Finance Secretary	+91 9774687486
Initoli. K.	Women Affairs Secretary	+91 8257904739
KI. Leirung Dangshawa	Games & Sports Secretary	+91 8974918167
Kaoliangpou Kamei	Social Cultural Secretary	+91 9899754667
Pamyaphy Chamroy	Public Relations Secretary	+91 7085139702
Nekhini Matia	Assistant Public Relations Secretary	+91 8974083062

ASSEMBLY AFFAIRS:

NAME	DESIGNATION	CONTACT
KS. Masotmi	Speaker	+91 9873509699
Akina Sumi	Deputy Speaker	+91 8732823335
Comfort Shingne	Assembly Secretary	+91 8447411709

Convener:
Dalounii Angam
Vice President,
NSUD

Co-convener:
T. Raisung
Assistant General Secretary,
NSUD



TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 27, 2021

Ali Senmang

Alima ya asenoki yangluba masü, anungji shitakbabo asenok meyongbo masü saka asenok alima nung ali tashi asen meyong ama kuma ketdangsütsü atema Tsüngremi yanglu aser Pai asenok nem agütsü, anungji asenok alima nung ali tashi putu ka nungi ka ta melentepa, ali ya Tsüngremi asenok nem agütsüba senmanga ta angateta tajungba-tajungba kuma anepalutsübjiang asenok khuret aser mapa asütsü. Aji oda, asenok meyong masüba agi ali rongsen ya nisungtem rongnung melentepa pei pei putu aser pei pei mapang nung amangtepa aruba asenoki angur. Aji oda, tanü asenok akaba ya yashi tangar meyong liasü aser ashiko asüngbo ano tangar meyong akümtsü. Iba jagi ali rongsen atema morumoru masütsü aser tashiyim aser ochimashi agi ali rongsen mebendentsü asoshi Laishibaia ashir aser tsüraburtemia tatishitsü aser tansütsü otsü kuma jembia aru. Iba tangatetba nung, asenoka asen tsürabur mapang tesem balala yim tasen kuma ali senmang amangtepa arur. Aji oda, ali tesem ka mesemteta yangji yim kümteta sobalibaa aodang ali nungi asenoki asen nungdak rongsen kiojen nungi shir senti oset aika yangluteta asenok kibur akümer aser item rongsen kibur dangji senmanger ta ajar. Junger majungka, asen sobaliba nung ali rongsen senmangji tebur meyong lir. Iba jagi kibong ka nung tebur mesosemra ali senmangji pei adianu mesüra külemkidong purtem dangi aoer. Atangji, tetsürtem nembo kecha ali senmanga magütsür mesüra kinungbo süadoker jabaso melira, kidang nungi meinzüka yutsür ta masü saka tsürabur mapang takaribo pei jala nema alushi karbo shiteta yutsü aser kinungbo süadoker senlem danga, kinungtsü amitsür kümer timmedemi lia aotsü atema kinungbo tenati züsentetba aser bendenba rongsen nungia la shilem peria lemsütsü aser kinungertemi kisüjensü aser alu mapa ajak nung yaritepa ao. Ajisüaka, kibong nung jalatem asoshi tebu nungi angutsüba senmangbo kecha mali, anungji parnok kibakeyii aodang nisung tajung medenjira tejenokdaka maka timatemtsüsa tia-a ajurur. Tanübo, ano ali senmang tsütsü tebilemstsü kaji, akhi tsüraburtemi akümba yimtak yimtsüngtem nung dang masü saka akhidang bendang lima ama jembiba limatem aika asen lima kümer nütsüngnübo den rongsen jenti renlok odagi. Aji oda, akhidangbo ali kimong ajak teburtemi dang lepteta mesemtet, anungji tebur meyong senmang aküm saka tanübo tetsür tebur kecha mali, pei kolok aser pei sempet amshia rongsen bushir, anungji kibong aika nung kinungbo dang nungibo kinungtsüiang senotsü teimba ajangzüker. Ibaji dang masü saka government mapa nunga teburtem dang nungibo tetsürtemang jenjang temaba nung inyaker, anungji ita sena tetsür teimba angur, aji oda tebur masü tetsüriang kibong mesür. Ano, tebilemdangtsü kaji, akhi tsürabur mapang senmangji alushi kar den tekong lu aser süra ki aser kidang nok, nü aser alulem dang liasü saka tanübo chirnurtemi tsürabur ali senmang amangtsübjaji farm alitsüa akok, industry alitsüa akok aser business company tulu lapoka alitsüa akok. Ano kiojen aser li kimonga asen lima nung dang masü saka bendang balala nung kia aser alia akatsüa akok. Item rongsentemji kodang bilemdangdir, itemjibo akhi tsürabur senmang amangtepa yimya nungbo melemtetsü aser mamangtetsü, anungji tanüa tanü putu den apet ali senmang amangtepa sobalibaren ya melenshia amangteptsü kanga nungdaker. Iba tangatetba nung asenoki yangi taoba hopta nung " akhi tsüraburtemi yim akümdang yatetba ali kimong aser alushi dak alaka, tanü putu tasenba nung kibong kati ajangzüktetba ali rongsentem madakbo, kibur kuma senmangtsü asoshi, tetsür-tebur, jala-jabaso ta mali, kibong nung tsürabur ana mulung südaktsü nunga koma süla ?" ta asüba onük nung shisalemsatepogo. Atangji, aikati tanü asüng ajangzüktetba rongsenembo pei tsüraburtemi mulungba nung pei jala jabsotem nem lemsaa amangdaktsütsü tim ta asüba tangatetba lemsatepogo aser aji shitak lir. Iba kasa tangatetba nung tsüraburtem aikati inyaker aser kinunger adianutemia aser yimtenia mashishir, kechiyong itemjibo tsürabur senmang masü saka peisasa pei mapa agi ajangzüktetba ali rongsentem lir. Ajisüaka, ano tesem kar nungbo item ali rongsentem alemdang kinungertem rongnung mangatetep adoker. Anungji, iba ali senmang amangtepa sobaliba ya asenok rongnung asenoksasa benteta ayutsü kanga nungdaka kümogo. Ano, tanü ama ali senmang indang jembidang, asenok ajaki angatetsüba kaji, shibai tsürabur senmang amangdir amangaka, pai mesüra lai amangtsüba senmangji tagitsü dangbo masü saka tsüraburi tsüa yutsüba sentsü (debts) dena aotsüba khuretjia senmang lir ta angatetsüla. Iba tangatetba nung asen tsürabur mapang nungi senmang amangtsü purtemi tagitarutsü aser sentsüsenlem ajak amanga arur.

OLEMSABANG

Tanü putu nung yimsüsürtem ya tsünü-i san küp sümer nüburtem madak yimsü asüpa mesüka lir

~ R. Imkong Lkr, Dimapur.

(Yashi adok nungi...)

Tanü asen lima yimsüsüba ya tema tereprangtsü nungbo kanga junger ama sayur, saka tanü yimsüsürtemi kanga nemrepa timtema aliba nüburtembo khen agi meyarir ta reprangteter. Tanü shirnok takar aser tulurtem lir, parnok jagi kanga timtema aliba nüburtem tu hau ta malir, saka parnokbo kanga mola moshia jangratema liyonga aoba ngua arudagi. Saka kenü anogo item kibongtem dangi timtem arudangbo parnok jagia ayakhu tena asen teyanglur Tsüngremisa bushitsü. Saka iba anogo nungjibo par rongsen jagi Tsüngremji mesüzütsü makoktsü ta angatetdi. Yangi temalen takartem indang shia aliba amaji, shirnokisa sensakertem dang nungi ayazüka achir, tatishitsü agi sentem tali agiba, aser ano timtema alitang yarir ama sayur kimong lumang ruzüka ayuba, mesüra ano tagi tarutsü oset-tsüset kar pei tetsü tebo mapang nungi senmang yua akaba meshizüka ayuba jagi pei kibong nung nalok nari benlokba tatishitsü agi tsürabor ama kenshi oshi matokba, mesüra tera matumalem tanurtem sotetba item ajakji odangbo mataloker ta metettsüla.

Tanü asen lima nung yimsüsürtemji itemi lir.

1. Unit state ka nung Ministertem aser MLA tem.
2. Commissionertem aser Secretarytem.
3. Directorettem aser Police nung tulurtem.
4. Doctortem aser Nursetem aser parnok kübok alritem.
5. Yimtsüng nung yimsüsürtem aser parnok kübok potangtem (next in ranks). Aser town balala nung yimsüsürtem ajak yangji densema lir.

Tanapuba nung tamangba yimsü indang tatsüka lemsateper, tanü lima nung tamangba yimsü nung keta asenertem aika angur, tongtibangsa India linük ama tulu nung tamangba yimsü aika angur, item tamangba yimsü aika aliba rongnung tila tari temji mezüngi tongtibang (major religion) kar yamai angur, Hindu, Muslim, Khristian, Budhis, Sikhs. Item tongtibang pengu rongnungi Hindu tamangba yimsü ya nütsüng nübu timba kati amangba angur. Parnoki par tsüngremji tang shidakba tsüngrem ta züngshia amanger. Aji oda parnok tangar tamangba yimsütemji kangabo mezünshir, anungji parnok par tamangba yimsü dakji ajemdaker telong nung terenemba kar ayur, parnok par nungtak nung amshitsü atema sepait aiaka shima renema ayur, aser koba mapang nungsa nungtak adokdir item sepaitem tashiji amshia tangar tamangba yimsütemji samatsütsü meranger. Yamaji India nung Hindu yimsü dak akanga amangertemim parnok tangatetba nung mapa tamajung kanga inyaker, aser item telok yagi khirstan tamangba yimsü dak tenük kanga yoker. Kechiba ta süra, khristantemi mokokminertem aser lajartem shirnok tachi tajemtsü peria maka itempurtemji yarir aser parnokji khrista tamangba yimsü dangi annir arur, iba jagi Hindu nungertemi khirstantem dak tenük kanga meremer aser tenla kitem raksaja rongtoktsü, aser khristanpurtem dak teka sangshia azüker, aser pastortem den külemi tenzükertem aika rishikangshia tepseter. Aser ano khristanpur aika pei yimtsüng arem nungji lia tetsü tanurtem dak Hindu sepaitemi mapa tamajung inyaker. Yamaji parnok arem nungji tachi tajemtsü mekai aika aya tsüra agi timtema asüba osang kaketttem ajanga angashir. Ano iba dakji alaka, tesem balala nung khirstanpurtem aika timtem tulu ataloka asüba mengujemba aser mangashiba aika tesülenang meteta akümba asenoki angashir.

Tanü asenoki inyaktettsüba mapa kaji, asenoki India tesem balalai oa asen khristanpurtem asoshiji chiyungtsü süale, abensuoshi süale yoka yaritettsüa leman lapokjang ni ta asen kibuba Tsüngrem tang sarasadema tenlatepdi arungma. Tanü asenoki Hindu yimsü nung akanga amangertem denji tejak o tejak na jetepa meraratettsü, anungji tejen lai mapang nung Elija aiketer-i kibuba Tsüngrem tang akang akanga sarasademba ajanga pa aser par telok nem takok tulu agütsüba amaji, tanüa asenoki asen kibuba Tsüngrem tang hindu nung sünnyanglu külemertem anemaji pa tashi aser ain jazüka sarasademtsütsübjaji takoktsü leman südakjang ta akangakanga lumia sarasademtsüdi arungma. Tanü item sünnyanglu külemertemji tejen lai putu mapang nung Baal tsüngrem külemertemdenji kecha balaka masü ta amanga, parnok dangji asen Tsüngremji taküm aliba Tsüngrem ta angatetdaksütsü aser amangdaktsütsü akang akanga sarasademtsüdi arungma.

Tanü asenoki yisu khrista dak amangba ajanga kechi tajangzüker aser temoatsütem angur, khen arok aroka bilemdangdi, aser ano asen taküm ya tanü tashi alima warashira tamajung nungi kümzüka doktsüba asoshia pa tenüng tali sangdi arungma. Tanü yabo joko amangle amangatokerji asen taküm nung kechi temoatsütemsa angur ta asübjaji tongtibangba masü, saka tanü akümüli ya tembangatoker külen asen tanelaji tekümüzik daki teti atema chichia otettsü ta asübjiang tongtibangba ta angateta lira, aseni amanga aruba tajangzükerji ibaji asütsü.

Tanü asenok Aortem tekolak nung ABAM yimsüsürtem mena lir, aser iba dakji sendakaloka tamangertem Nagaland ajonga nung prokshia Arogo balala tenteta liyonga aoba angur, iba dakji alaka ano India tesem balala nung asen Aortem tenla ki lapoka Arogo ka ka tenteta annir Arogo nung secretary, Deacon board aser tenzükertem aser tenzüklatem ajak longjemer Arogo kaji bener aoba angur. Item Arogotemji tulu asü tila, takar Arogo asü sensaker Arogo ta asübjaji tongtibangba masü, saka pei-i amangbaji kodaka amangteter aser iba tamangbaji jagi kodak tongtetsüsa chichia amangteter asü masü ta asübjiang tongtibangba lir, iba denji külemi ano tanger mamangbapurtem kar khrista tangi annir aruteter asü masü ta asübjiang tongtibangba ta angatetdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Tamil Nadu nung Dalit nunger Khristantemi longkak ait



Chennai, July 23, 2021: Arogo nung Dalit nunger Khristantem nem tim maongka magütsüba anema July 23, 2021 nü Tamil Nadu nung Dalit nunger Khristantemi longkak aitba noksa nung angur.

New Delhi, Chiteni/July 26

(Agencies): Tamil Nadu kübok Salem nung Arogo tongti putir tasenba, Arulselvam Rayappan agizüksü anogo ishika jelia Dalit nunger Khristantemi July 23, 2021 nü longkak aitogo.

India nung Arogotem nung Dalit nunger Khristantem nem tim temeden magütsüba aser maongka magütsüba anema July 23 nü Dalit Christian Liberation Movement (DCLM)-i ayongzüka Dalit Khristantemi Salem nung aliba District Collector Office kima longkak aita liasü.

Longkak aiteremisa district collector ajuru aser Catholic Arogotem nung kin nung ajemdaker Dalit nunger bendanga züngshiba indang tezüluba nung temepishiba shidi ka agütsü.

Parnokisa Tamil Nadu state sorkar aser Centre sorkar na dang Arogo nung Dalit nunger bendanga züngshiba anentsü atema inyakdaksüner, ta mepishi.

Osangbener den jembidang DCLM Tir, Mary John-i, "Onoki Tamil Nadu nung Dalit nungera putir shimtsü atema aiben takhangba agüja aruogo, ajisüaka onoki akhangba mataloktsüba agi onoki lenmang nung longkak aittsüa akümer. Onoki ayimdenba ola mangashir aser Catholic Arogoi onoki mepishiba mangar," ta metetdaksü.

"August 4 nü Salem nung tongti putir tasen, Arulselvam Rayappan agizüksü alibaji thinena lidaksüner. Tamil Nadu aser Pondicherry na nung menden tazüing alibatem nung Dalit nunger ka tongti putir shimtsüla aser Dalit nunger putirtem meshim tashi ibaji anena alitsüla," ta laisa metetdaksü.

"Onok tejashi sayutsü atema onoki lenmang nung longkak aiter. Arogoi kin bendanga züngshiba angatetdaksütsü teimla nung onoki longkak aiter. Talisa Tamil Nadu aser Pondicherry na nung tejak repranga putirtem shimmer. Tesüiba küm 15 tsüingda Dalit nunger masüba nisungtem ang putir aser tongti putirtem shima arudar," ta lai metetdaksü.

"Region nung Catholic Khristan nütsüing shilem 75 bo Dalit nungertem lir, ajisüaka region nung aliba Catholic Arogo 18 nung Dalit nungibo tongti putir ka dang lir. Küm aika onok sendoka arur," ta lai metetdaksü.

Longkak aiteremisa Pope Francis dang India Arogo nung kin bendanga züngshiba anentsü atema tiyongtsüi aita inyakdaksüner, ta mepishi.

"Onoki (DCLM) Vatican dangi shidi aiben zülüogo. Arogoi kin nung ajemdaker bendanga züngshiba angatetdaksütsü atema onoki yimjak nung longkak aiter," ta Mary John-i ashi.

Iba dak sendakba nung osangbener den jembidang Salem nung tongti putir, Sebastianappan Singaroyan-i, "District collector office kima telok tila kati longkak aitba osang onoki osangkaket ajanga jangja, ajisüaka iba dakji alaka onoki kecha memetet," ta ashi.

Osangbener den jembidang Tamil Nadu Bishops' Council nung deputy secretary, L. Sahayaraj-i, "Ni longkak aitba osang kecha memetet. Iba onük nungji ni jembitsü kecha mali," ta ashi.

Tan ita tetenzüklen-a Dalit Khristan organization kati Catholic Arogo nung Dalit nunger nem tim temeden magütsüba aser maongka magütsüba anema Vatican

tribunal dangi temepishiba shidi ka zülüa liasü.

Osangbener den jembidang National Council of Dalit Christians (NCDC) Tamil Nadu state vice-president, S. Vincent-i, "Ozü teloki Arogo nung Dalit Khristantem bendanga züngshiba anema June 25 nü Madras High Court nung temepishiba ken o ka benokogo. Onoki kasa onükji Vatican tribunal nem-a metetdaksüogo," ta metetdaksü.

"Onoki Vatican tribunal dang onok timtem reprangshitsü aser onok nem tim temeden agütsütsü atema inyaktsü mepishir. Onoki (Dalits) scheduled caste jenjang akhanger aser iba ken oji Supreme Court nung benoka lir," ta paisa metetdaksü.

India nung 1950 küm Presidential order ka ajanga scheduled caste dangi meyipertem nem agütsüba maongka balala agienba sülen Dalit Khristantem aser Muslim nungeri scheduled castes jenjang akhanger.

Item maongkaji Sikhs (1956 küm) aser Buddhist (1990 küm) nunger nembo tanaben agütsüogo, ajisüaka Khristan aser Muslim nunger nembo tanaben item maongka magütsür.

Hindu nunger loktiliba nung Dalit nunger ya teküboktiba kin lir, ajisüaka tesüiba küm aika tsüingda Dalit nunger aika Khristan aser Muslim yimsü dangi meyipogo.

"Dalit" tetezü Sanskrit oshi nung "ajemshidaksüba" lir.

Sorkar data ajanga ashiba agi, India nunger nütsüing billion 1.2 nungi Dalit nunger nütsüing million 201 lir aser India nung Khristan nütsüing million 25 nungi shilem 60 bo Dalit aser tribal Khristantem lir.

ANOGO ABEN TSÜNGREM DEN

"Masü, Kibuba" temelen masü


Idangyongji parnoki parnok rong aser parnok tebu toktsü aser Pa sülen anidak. Mathi 4:22

Kodang Yisui Pa mapa tenzük, Pa kijai "temulung meyiptsü aser kümzüksü" osangtajungji alima ajunga dangi bener moutettsü ta Pai meteta liasü. Iba melen, Pai sayutettsüba nütsüing 12 shimtet aser parnoki tangar dang sayutettsüba pur dang sayutsü. (2 Timothy 2:2). Yisui Pa den atentsü ajaba rongnung Yakob aser Yohan mezüingbuba aja. Kodang Yisui parnok den jembi parnoki ibai tebilemba tajung ta mashi, mesüra marutettsü taka mashi, saka idangyongjisa anidak. Küm aika tejakdang Abraham dang Tsüngremi jembi, parnoki ashi, "Hai, Kibuba." Parnoki tesülen ajak doktsü - parnok tebu, parnok rong, aser parnok tesüiba taküm kechiaser Yisui parnok aja.

Tanüa Yisui na aser ni ajar. Asenok taküm azüoker Pa sülen anidaktsü Pai ajar. Peisasa azüoker anogoshia pei kangki aputsü Pai ajar (Luke 9:23). Ajak dak alia Pa tali meimtsü asoshi Pai asenok ajar. Tebu, tetsü, chirnur, adianu, kinüngtsü dang tali Ni meimra pa/la Kü nütsüing asütsü metemsü (Luke 14:26-27). Asenoki ajak toktsür asü, mesüra kar dang asen taküm den sütepba yanglur tetsüing külenbo alima nungsa ajemmoker Pa sülen anidaker? Kodang Pai Pa anidaktsü ozüing agütsür "Kibubaji" temelen ka masür. Idakji telangzüksü ana dang lir: "Lemang mali" mesüra "Hai, Kibuba". Kodang Pai asenok jadiri asenok Yakob aser Yohani anidakba ama anidaktsüla. Idangyongji parnoki parnok akaba ajak toktsür Pai ajaba nangzük. Tatemzükba kuli teyanglu. Pai kechi atema asenok aja iba atema Pai asenok renemtsütsü ta metettang.

Oba, ni tanü Ne ola angashitsü kü temetetba shisatsü nung kongshiang aser ni tashi anga nangzükdakjang. Amen.

Kanye West-i Las Vegas nung aliba Arogo ka nung Donda kensep saya



July 26, 2021: Taoba hopta tatembanglen osangtajung kentener, Kanye West-i Las Vegas nung aliba Arogo ka nung pa indang kensep tasenba 'Donda' nungi ken ajak tema angadaksü.

Amongnü (July 18) Pastor Benny Perez-i aniba Arogo nung Kanye West-i pa indang kensep tasenba nungi ken ajak atem. Iba sentong nungji jelia tenüing agütsür alirtem dang aden.

Sentong nungji Kanye West-i computer nungi ken ajak atem, saka pai sentong nungji shilem agia kecha mejembi.

Osangbener den jembidang iba sentong nungji adener kati, "Atangji iba sentong balaka agitetogo. Iba sentong ya pa indang kensep tasenba angadaksüba sentong ka liasü.

Piano atemer pezü den tanurtemi musical intro ka atem, iba sülen Kanye arua pa indang laptop lapoker kensep tasenba nungjagi ken ajak atem. Pai o mejembi. Sentongji khenyongi balaka liasü aser jangratemtsüka liasü," ta metetdaksü.

Ken ka nungbo Tsüngremi pa taküm nung sayatenya mapatem inyakba indang lemsatepa lir, ano ken ka nung 'Tsüngremi item ajak apuoktsü' ta shia lir, koba tetezü iba kensep nung aliba kenjang ajakji Tsüngrem nungi lir, ta ashiba lir.

Pastor Perez-i video ka ajanga, Kanye West indang kensep nungi pa atemabo ken tajungtibaji "God Breathed" lir, ta lemsatepa liasü.

Kanye-i kensep tasenba nungja 'Donda' ya tetsü asür nungtem nung jaloktsü; July 15 nüa pai Atlanta, Georgia nung aliba Mercedes-Benz Stadium nung iba kensep nungi ken kar angadaksüba sentong ayongzüka liasü, aser iba sentong nungji nisung 42,000 shi aden.

Nüngtugu rap kentener, Kanye West-i tesüiba küm ishika osangtajung ken atener. 2019 küm pai osangtajung kensep mezüingbuba 'Jesus Is King' sayaa liasü.



July 26, 2021 nü Dehradun nung 22buba Kargil Vijay Diwas amongdang Uttarakhand Chief Minister, Pushkar Singh Dhami-i Kargil rara nung asürtem nem akhüm agütsüba noksa nung angur.

Pegasus ken o bushitsü atema Bengal nung luden ka tentettsü

Kolkata, July 26 (Agencies): West Bengal nung Pegasus spyware ajanga phone itangitba ken o bushisüngdangtsü atema Hombarnü West Bengal Chief Minister, Mamata Banerjee-i judges- Justice MV Lokur aser Justice Jyotirmoy Bhattacharya nati akümba luden ka tentettsü tuyuogo, ta ketdangsertemi metetdaksü. Israel nung Pegasus spyware amshia India nung yimten lenirtem, osangbenertem aser tongtibang nisungtem indang phone ittangita liasü aser item lenirtem rongnung Mamata'er kinünger

asert Trinamool Congress MP, Abhishek Banerjee indang phone number-a densema lir. Hombarnü Chief Minister, Mamata leniba nung Cabinet senden ka amenba mapang nung Pegasus ken o bushisüngdangtsü atema luden ka tentettsü telemtetba agi. Osangbenertem den jembidang Trinamool Congress tongti lenir Mamata-i, "Phone itangitba ken o bushisüngdangtsü atema Centre-i inquiry commission ka tentettsü mesüra court-i ketdangtsüa bushisüngdangtsü atema tuyutsü, ta onoki imlaa liasü, ajisüaka Centre sorkari

kecha meinyaker. Anungji onoki iba ken o bushisüngdangtsü atema 'commission on inquiry' tentettsü telemtetba agi," ta metetdaksü. Iba commission nung züngsem anaji taoba mapang Calcutta High court nung Chief Justice Jyotirmay Bhattacharya aser taoba mapang Supreme Court judge Madan Bhimrao Lokur na lir. "Pegasus target list nungji West Bengal nungia tenüing ishika lir. Centre sorkari nisung ajak itangittsü meranger. Ozüing alema itangitba osangji commission-i jangjatsü," ta lai ashi.

Karnataka nung BS Yediyurappa-i Chief Minister menden toktsüogo

Bengaluru, Chiteni/July 26 (Agencies): Karnataka nung BJP lenir tain, BS Yediyurappa-i Hombarnü Chief Minister menden toktsüogo. Osangbenertem den jembidang pai, Chief Minister menden toktsütsü atema shingaia merongshi, saka pai pasasa iba menden toktsü, ta metetdaksü. Tamalena Yediyurappa-i, state nung BJP-i aniba sorkar küm ana ajungba sülenbo pai Chief Minister menden toktsütsü, ta sangdonger liasü. 2023 küm Karnataka Assembly election agitsü lia Yediyurappa-i, taruba election nunga BJP-i takok angutsü atema pai maneni inyaksü, ta metetdaksü. Hombarnü pai Raj Bhavan

nung Karnataka Angh, Thawar Chand Gehlot ajurua CM menden nungi anenba shidak agütsüba sülen osangbenertem den jembidang Yediyurappa-i, "Ni menden nungi anentsü atema shingaia ni merongshi. Sorkar küm ana ajungba sülen kari ni melentsü atema ni kü sasa iba menden toktsü. Taruba election nunga BJP-i takok angutsü atema ni inyaksü. Ni melentsü atema ni shinga tenüing mebenok," ta metetdaksü. Paisa pa pusemertem danga, Chief Minister shiba shimdir shimaka paji akokba tashi nungittsüla, ta mepishia metetdaksü. "Ni CM menden nungi anentsü atema anogo ana tejaklen telemtetba agir liasü.

Küm ana Karnataka tenzüiktsü atema kü nem maangka agütsüba atema ni Ato kilonser Modi, Home Minister Amit Shah aser BJP Tir, JP Nadda nung dang pelar. Ni Karnataka nüburtem aser ozü constituency nüburtem danga pelar," ta paisa metetdaksü. Karnataka nung CM tasen shimtsü atema Hombarnü nikongdang BJP-i central observers shimogo. Osang angazükba agi, Yediyurappa-i CM menden nungi anenba sülen BJP Tir JP Nadda, Union Home minister Amit Shah aser Karnataka in-charge, Arun Singh nung Parliament House nung adenshia Karnataka nung yimtenren tensa atema o lemtepogo.

Blinken-i India semdangba mapang meimchir temeden atema jembitsü

New Delhi, July 26 (Agencies): US Secretary of State, Antony Blinken-i New Delhi semdangtsü mapang ana nung lia Amongnü osangbenertem den jembidang pai, ni India semdangba mapang India nung ketdangsertem den democracy aser meimchir temeden atema jembitsü, ta jembiba sülen India-i iba oji ashishidar. Iba dak sendakba nung sorkar ketdangsertemi, India-i democratic inyakyim aser meimchir temeden atema inyakba asoshi linüki nüma atanger, ta ashi. Blinken-i July 27 nü India semdangtsü; pai anogo ananü linük semdangba mapang nung India External Affairs Minister,

S Jaishankar aser National Security Advisor Ajit Doval na ajurua senden amentsü. Paisa Ato kilonser Narendra Modi-a ajurutsü. Pegasus spyware amshia India nung yimtenren lenirtem, osangbenertem aser tongtibang nisungtem aika phone ajanga itangitogo, ta osang prokba ajanga linük nung iba onük nung o toktepba mapang ka nung US ketdangser Blinken-i India semdangtsü. Hokolbarnü osangbenertem den jembidang Acting Assistant Secretary of State for South & Central Asian Affairs, Dean Thompson-i, Antony Blinken-i India semdangba mapang nung India nung ketdangsertem den linük nung meimchir

temeden aser democracy onük süoka jembitsü, ta metetdakja liasü. "Meimchir temeden aser democracy ya ajak atema tongtibang onük. Onük atema atema India-i inyakba atema linüki nüma atanger, aser maneni inyaksü," ta India nung ketdangser kati metetdaksü. Antony Blinken-i tamalen-a India semdangogo, ajisüaka pai US Secretary of State mapa agizükba sülenbo tang mezüing pai India semdangtsü. Taküm March ita nung US Defence Secretary, Lloyd Austin-i India semdanga liasü aser April ita nung US Special Envoy on Climate Change, John Kerry-i India semdanga liasü.

OFFICE OF THE DIMAPUR SUNGRATSÜ SENSO TELONGJEM
Dimapur - 797112, Nagaland
Tenüngsang Agütsür

Teküboklen shia aliba kaketshirtemi 2021 HSLC & HSSLC Exams nung temaba jenjang nung takok anguba atema Dimapur Sungratsü Senso Telongjem, Ao Temolung Sungratsülar Telongjem Dimapur aser Dimapur Sungratsü Students Union-i parnok nem tetushi tulu agütsür aser Tsüngrem tenüing asanger.

- Sp. Tiamong Aier,**
Mr. & Mrs. Lipokyanger & Atsunpla na jabaso: HSLC Exams nung 9th Rank angu aser subject topper (English) angu.
- Kr. Wangshirena,**
Dr. & Mrs. Imtiwapang Aier & Kehungle na jala: HSLC Exam nung 19th Rank angu.
- Kr. Chubatola,**
Mr. & Mrs. asür Rongsenwapang Aier & Mrs. Nungshikala Lemtur na jala: HSSLC (Arts) Exam nung 8th Rank angu.



Iba dak alia Union-isa HSLC & HSSLC 2021 Exams nung takok angur ajak dang pelar aser tenüngsang agütsüba den külemi tarutsü nunga maneni takok ngudakjang ta sarasademtsür.

Sd/-
(LANUZULU AIER)
President

Sd/-
(MARCHITEN JAMIR)
General Secretary

Office of the **CHUNGZIA BAPTIST AROGO**
B.P.O Chungtia, P.O Mokokchung - 798601, Nagaland
"The grace of our Lord Jesus Christ be with you all, Amen."
Rev.22:21

Pelaba Lemsateper

Chungtia Jubilee Memorial School nungi Class X tatidang tanurtem parnok ter (10) agütsüba nungi parnok tukui (9) takok tajung nguteta Arogo nem tenüing tajung bener arutsüba asoshi tanurtem aser tesayurtem ajak dang Arogoi pelaba iba osang ajanga lemsateper. Iba den Chungtia lanurtem shirnoki School aser college balala nungi Class X aser XII telen balala nung takok tajung nguogo, nenok ajak nem arogoi tenüngsang agütsür. Tarutsü nung maneni takok tajung nguyonga aotsü arogopur tamang sarasadem den nenok ajak dang pelaba Tsüngrem tenüing sanga lemsateper.

Sd/-
(Rev. M. Laka Tzudir)
Pastor

Sd/-
(I. Meren Longchar)
Secretary cum Cashier

OFFICE OF THE CHUMUKEDIMALANGPANGKONG KAKETSHIR TELONGJEM

TENÜNGSANG AGÜTSÜR

Chumukedima Langpangkong Kaketshir Telongjem (CLKT) ajanga HSLC aser HSSLC tatidang 2021 nung kwikati takok ngutetogo nenok ajak nem tenüngsang agütsür, aser tarutsü nung Tsüngremi nenok taküm aser kaket shsiatsü bushiba nung tali moajangma.

Sd/-
(MOAMEREN IMSONG)
Tir, CLKT

Sd/-
(IMSURENLA IMSONG)
Tongti Zülur, CLKT

Tunisia police-i Al Jazeera office mita bushi



Deobar aonung Tunisia tiri khen atema parliament anenja Ato Kilonser mapa nungi anentsüba sülen nüburtemi longkak aitba ajanga July 26, 2021 nü Tunisia mitkartemi linük yimtiba, Tunis nung parliament temeket anükba noksa nung angur.

Tunis, Chiteni/July 26 (Agencies): Tunisia Tir Kais Saied-i Deobar aonung sorkar atsüngdokba sülen police tem linük yimtiba, Tunis nung aliba Al Jazeera indang bureau-i aita yangji inyaker ajak meindoka liasü.

Prangbong peria bena aliba police 20 shi civilian ama süoshi semer Hombarnü office telungi ait, ta Tunis nung Al Jazeera osangbener-i ashi aser police ket nung office mita bushitsü atema warrant meliasü, ta ashi. "Onok indang office azüngtettsü atema security forces nungi jelia osang kecha maru," ta Tunisia nung aliba Al Jazeera indang bureau tekolakba, Lotfi Hajji-i ashi.

Iba office mita bushiba nung densema alir security forces

temi, parnok ya linük indang judiciary nungi totuyuba agütsüba ama inyaker ta ashi aser osangbener ajak dang office yutsür aotsü ashi.

Security officer temi osangbener dang parnok indang phone shibangtsü totuyuba agütsü aser parnok indang osettsüset abentsü atema office telungi tanaben maitdaksü, ta osangbener temi ashi.

Sepaitemi danga osettsüset tem ajunga meshia ayu. Reporters Without Borders (RSF) ajanga sangdong ka nung, Tunisia nung Al Jazeera indang office lungbangba aser yimtenren mangatetep nung osangbener dendaktsüba aitsür, ta ashi.

Deobarnü Tir Saied-i parliament anentsü aser Ato

Kilonser Hichem Mechichi mapa nungi anenja liasü, koba pa den tokteper temi democracy mezüngmeshiba ta aitsü saka dangartem yimtung nung benjongtepa liasü.

Tir ajanga parliament ya anogo 30 atema anentsür, saka tensa mejungra mapang atsülangtsü akok, ta Saied-i osangbener dang ashi.

Sorkari COVID-19 tashidak wara junga ketdang mesütetba aser rongsenketzüng mejungi akumba mechi Tunisia kübok yimti balala nung azüdokshia longkak ait tenzü.

Ibai teblemetsü tulu lir, kechiaser 2014 kum constitution ajanga tir, ato kilonser aser parliament tsüngta tashi lemsatsü.

Afghanistan nung 2021 kum civilian jenti süogo: UN

Geneva, Chiteni/July 26 (Agencies): Afghanistan nung takum kum teshadang tashinung azüdokshi tali akumba ajanga civilian tem asüamaba aser yiruyipogba agi otsü tasen yanglua lir, ta United Nations ajanga ashir.

Afghanistan nung 2021 tenzüker tang tashinung civilian 1,600 dak tema süogo, ta report tasen ka ajanga ashi. Ibaji taoba kum kasa mapang den medemdangra shilem 47 agi timba akumba alitsü.

Aser ano maneni asürtem ya tali akumtsü akok, ta UN ajanga ashir.

Afghan sorkar meyong sepaitemi Taliban telungpurtem den rarayonga arur, shirnoki tangbo linük shilem tuluaka amokbangteta lir.

Kum 20 jungnüa Afghanistan nung linük balala nungi sepaitem adenshia rara arur item sepaitem ya timba ainshio.

2009 kum nungi tenzüka UN-i iba linük nung asüamaba

osangtem jungjunga asadanga bendena arur aser takum May aser June ita asüamar timba liasü.

UN report ajanga ashiba agi, civilian tem asüba ya shilem 64 bo sorkar anemba sepaitem mapa lir. Sorkar busemba sepaitemi tepsetba shilem 25 aser shilem 11 ya telok balala tsüngta raraba mapang asüba lir. Asürtem rongnung shilem 32 bo tila-tanurtem lir.

Afghan sorkar aser Taliban tsüngta yimjung ken o jembiba tsütsü terenlok mali. UN special envoy for Afghanistan, Deborah Lyons-i telok anaprang dang rara ajanga takoksa bener arutsüba süoki ia agitsü ajungshi.

"Azüdokshi tali akumba ya ajema mekumra takum Afghan nung civilian aika takum samatsü aser yirutsü ta report ajanga tejangja sayur," ta lai UN sangdong nung ashi.

2001 kum US-i anir Afghanistan amakba ajanga

Taliban telok yimsüsüba menden nungi atsüngdoka liasü.

Takum US Tir Joe Biden-i US sepaitem ya Afghanistan nungi September ita tashinung anizüker omatsü sangdong.

US commander Gen Kenneth McKenzie-i Honibarnü sangdong ka nung, par sepaitemi Afghan sepai yaria maneni tayimtsü nungi amaktsü, ta ashi. Taliban nem takok mongudaktsütsü, ta pai ashi.

Ajisüaka August 31 nü US military mission tembangba sülena maneni amaktsü asü masüar, ajibo Gen McKenzie-i mashi.

Taoba hopta Taliban telok Kandahar yimti leni aruba mapang US sepaitemi tayimtsü amshia amak.

Taliban teloki yimti balala amakba anendaktsütsü nükjidong nung Afghan ketdangsürtemi linük tesem timba nung aonung curfew ita ka alitsü sangdonga liasü.

Office of the
ONGPANGKONG TETSÜR MUNG DANG
Hq. Mokochung Town, 798601: Nagaland
Regd. No. ED/GSS/RS-1039 Dt. Kma 22.7.86
Nükjidong: "Telongjem Ajanga Takok"

TETUSHI AGÜTSÜR

Ongpangkong Tetsür Mungdang mendenti ajanga Tzükongsanger/Tzükongsür kaket shisaluyimer 2021 kum NBSE ajanga agiba HSLC aser HSSLC/CISCE ajanga agiba ICSE aser ISC tatidangtem nung temaba jenjang nung takok nguteterem, State subject toppers aser takok angurtem ajak den tepela lemsateper aser konang tetushi agütsür. Takoksang Tsüngremi nenok ajak maneni takok nung len ania moajangma.

Alakteta temaba jenjang nung takok angurtem:

HSLC			
Sl No	Name	Village	Rank
1.	Sp. Talinungsang Imchen, S/o Wb. Moameren Imchen & Wt. Sentirenla	Mangmetong	Top 3
2.	Sp. Limatongzük Longkumer, S/o Wb. Jongpongtemshi Lkr & Wt. Toshiarenla Jamir	Longsa	Top 11
3.	Sp. Aotushi Imsong S/o Wb. Taliwapang Imsong & Wt. Pangerlemla	Ungma	Top 12
HSSLC (Arts)			
1.	Kr. Imlisungla Pongen, D/o Wb. Limaakum Pongen & Wt. Tajungsangla Jamir	Longmisa	Top 1
2.	Sp. Yimtiyong Longkumer, S/o Wb. Lt. Lipokyangger & Wt. Moalemla	Ungma	Top 7
HSSLC (Science)			
1.	Sp. Imcharenba Atsongchanger, S/o Wb. Yashimeren Atsongchanger & Wt. Lolentsungla	Mokochung	Top 6

Sd/-
Wt. Akumchila
Mendenbula

Sd/-
Wt. Imodangla
Tezülula

Mali tir tepsettsü merangsang süogo

Bamako, Chiteni/July 26 (Agencies): Taoba hopta Mali interim tir Assimi Goita gotari agi tsüngsettsü merangba atema aitsür alisang security services custody nung lia mozüki nung süogo, ta sorkar sangdong ka ajanga Deobarnü metetdaksü.

Goita ya special forces colonel ka lir, shibai taoba kum sorkar anaben tashi atsünga liasü, pa Mongolbarnü linük yimtiba Barakok kübok mosque ka nung sarasadema aliba mapang tepsettsü merang saka tarak meketi jenbo.

Security agents temi nisung ka military pickup truck ka nung inoker anir aoba video ajanga sayuogo aser kasa mapang nung Goita-a bodyguard temi

longbanger anir ao. "Ken o bushisüngdanga aliba mapang pa health tamajungba küma ao," ta kasa sangdong ajanga metetdaksü. Pa mozüki kati anir ao aser idakji süadok. Pa asüba kuli jangjatsü atema tang bushisüngdangdar.

Mali, kong France-i teyari agüja al Qaeda aser Islamic State telungpurtem den kum aika raraa arudar, iba linük nung Goita-i anir military-i 2020 kum August ita tir Ibrahim Boubacar Keita atsüngtokba sülen yimden yimsüsüba tsütsü mepetmesü tulu adoka liasü.

Goita ya transitional lenir Bah Ndaw indang vice-president liasü saka May ita pai Ndaw-a atsüngtok.

Russia PM-i Pacific nung asetkong kar semdang

Moscow, Chiteni/July 26 (Agencies): Russia Ato Kilonser-i Hombarnü Pacific nung asetkong kar semdang, koba Japan-i parnok meyong ta khanga arudar, aser ashiba agi, sorkari iba tesem nung special economic zone ka amenoktsü asadangdar.

Ato Kilonser Mikhail Mishustin-i iba hopta Russia kübok anüdok tiplen tesem kar aser Siberia semdangtsü sentong yanglur lir aser Hombarnü pai mezüngbuba Kuril asetkongtem semdanga liasü.

Mishustin-i, Iturup nung mozüki ka aser ango ayokdak ka semdanga liasü. Iturup ya Kuril asetkong rongnung ka lir. Ango ayokdak semdanga mapang pai, sorkari iba asetkong nung special economic zone ka amenoktsü asadangdar, kong business aser investor tem dang saru aser customs duties timbaka memeshitsü, ta ashi.

Russia nung ketdangsürtemi tang asadanga aliba inyakyim ajanga anüolen densema investor tem nem aser Japan-ia iba tesem nung mapa adokdaktsütsü tejangraba lira parnok atema tajangzük asütsü, ta Mishustin-i ahiba den iba inyakyim ajanga asetkong nung shishilemba tali ajungkettsü ta ashi. Paisa, pai iba inyakyim Russia tir Vladimir Putin den sensak asemtsü ta ashi.

Hokolbarnü Putin-i, Mishustin dang linük anüdoklen semdanga mapang Kuril asetkong tongtibangsa semdangtsü atema shiogo aser iba tesem nung shishilemba maparen balala nung sendaka alirtem jenjang ajungkettsütsü atema Japan nung partner tem den Moscow-i inyaktepa arudar, ta ashi.

Japan-i iba asetkong ya parnok meyong ta ashir aser Northern Territories ta ajar. Soviet Union-i World War II tembangba anogo iba asetkong atsüng aser iba tesem atema mangatetep aliba ajanga linük ana tsüngda mangatetep aliba tembangtsü asoshi peace treaty ka nung sign mesüeti arudar.

Ken o angateteptsü atema kum aika inyaksangshia arudar saka tang tashi nung kecha ataloka mali.

Taoba Japan Ato Kilonser Shinzo Abe-i, telemtetba ka agitsü atema timla nung mapang aika intoka inyaksangshio, saka tajangzük kangabo mali.

Taoba kum PM mapa belenzükba sülen mapang tatsüka lir Yoshihide Suga-i, Putin den sensaksemba mapang linük litsü dak sendakba nung mangatetep aliba indang benoka sensaksemogo aser peace treaty ka nung sign asütsü atema tangatetep ka dangi arutsü imlaba lemsatep.

Wokha DC-i Longsa yimdak borewell ka lapoktsü

Wokha, Chiteni/July 26, 2021 (TYO): Hombarnü, Deputy Commissioner, Wokha, Orenthung Lotha-i Lt. John hostel, Longsa village nung borewell (water supply scheme den 8KL storage Syntax) ka lapoktsüogo. Iba borewell ya MCA project, OP Sadhbhvna Project kübok yanglua liasü, ta sangdong ajanga metetdaksü.

Lt. John hostel nung iba scheme amenoktsüba atema DC-i Assam Rifles dang pelaba metetdaksü aser iba scheme ajanga nüburtem kanga ajangzüksü imlar, ta lemsatep.

District nung iba project amenoktsü asoshi maparen achaayangba atema Orenthung-i, Major Dr. Robin Goyal danga pelaba shisem.

Maneni, iba hostel aser temeküt tesem nung alirtem tenüng nungi, Father John Ntons-ia Assam Rifles dang pelaba lemsatepogo, ta kasa sangdong ajanga metetdaksü.

Mulungnen O

"Asenok pa den süra, asenoka pa den taküm alitsü" 2 Timoti 2:11



ASÜR. MAKZÜKALA TZÜDI
ASO : 16.07.1930 - ASÜ: 17.07.2021

Onoki teti meima aliba ojala, asür **Makzükala Tzüdi**, la mapang talangka shiranga aser la iba akümüli nungi pila orr onok mangyim jashi nung alidang, kija aser tentet balala shirnokisa tsüngdong arua, nübu, rongsen, tanela, osang-ola agitepa aser sarasadem ajanga nungita yariogo, nenok ajak dang ozüi pelaba lemsateper.

Nenok kija shia tenüng teta ozüi pelar ta meshitetba atema sasa bilemer, saka Tulusang Tsüngremi nenok mapa tajung asoshi molamushia moajangma ta ozüi sarasademtsür.

Temeim, Jabasotem, Jalatem, Anük-apangtem, Semchirtem aser Tanabuba Semchirtem.

Mulungnen O



Onok temeim tebu asür **IMPANGONEN JAMIR** shiba July 17, 2021 anogo nung ajongbena alima nungi pila-a liasü. Ozü asüko mapang shirnokisa onok den mangyim jashi lemsatepogo, nenok ajak dang kanga pelar.

Nenok temeim teyaritep, aria bilemba aser metitemi sarasademtsüba ajanga onok tejashi tepungpaba kümdaksüja liasü. Nenok kija shia dangi arua pelaba melemsatepteter. Anungji, iba Mulungnen o ajanga onok temulung taroktiba nungi pelaba metetdaksür.

"Anungji tang nenok tejashi kar; saka ni nenok tanaben angutsü. Aser nenok temulung pelatsü, aser nenok tepela shingaia nenok nungi merakzüksü." -Yohan 16 : 22.

~ Temeim Kinungtsü, Chirurtem aser Kinungertem.

Zunheboto District Hospital nung Charitable Ward ka lapokogo

Zunheboto, Chiteni/July 26, 2021 (TYO): Honibarnü, contractor aser Ghaspani-1 nungi taoba candidate, Z Kasheto Yephthomi-i Zunheboto District nung charitable ward ka semzüksüogo, ta sangdong ajanga metetdaksü.

'One More Breath Charity' project kübok India nung Round Table India trust aser Association of 41 club longjemer sen lakh 40 dak tema alang hospital nung amshiba yipden aser osettsüset tem tenla agütsü.

District Hospital, Zunheboto nung iba ward lapokba sentong agia liasü, kong tongtibang Sumi tentettem, CMO Zunheboto, MS Zunheboto aser iba hospital nungi tanga staff tem aruagi denogo. Iba sentong nung tetushi tesemdanger ama Kasheto Yephthomi dena liasü.

Iba project ya 41'ER, Vice Chairman 41 India Area 5, Samir Jain, Delhi Amigos

Round table 311 HT Pankaj Agarwal aser Progressive Round Table 238 Guwahati, TR Nitesh Bharech nungeri inyak.

Tang ama tensa tamajungdang, nübur aria bilemja iba District Hospital, Zunheboto nung mapa tajung inyakba atema Deputy Commissioner, Zunheboto-i, 41 clubs of India aser Round Table India Trust dang pelaba metetdaksü.

Timtemer tem tajungtiba nung aneplautsü asoshi DC-i doctor, nurse aser medical staff tem dang item oset kümdanga amshitsü ajungshia liasü.

Bharech Guwahati, TR Nitesh-i project dak sendakba nung jembiba mapang, one more breath kübok 41 clubs den RTI longjemer India tesem ajunglen hospital nung yipden 3000 aser oxygen concentrator tem agütsütsü nükjidong yur inyaker aser Nagaland kübok

hospital balala nung mamshiba ward tazünglatem nung osettsüset balala agüja maparen tajungba achaayangtsü asalentong yangludat.

Nüburtem ajangzüksü asoshi item oset tajungtiba nung ketdangsüa amshitsüla, ta pai district hospital nung tekolakpurtem dang mepishiogo.

Z.Kasheto-i, vaccine indang tongtibangtem nung ajemdaker jembiba aser pai sentong nung adenertem dang doctor aser nurse dak tamang akatsü asoshi mepishiogo. District nung iba project takok ngua inyaktetsüsa shilem tulu agiba atema, pai DC, CMO aser staff, Sumi Hoho, Dr Aron, DIO aser Dr Shikato dang pelaba shisem.

Iba sentong nung, SMO, Dr. K Shikato Sema menden liasü. Medical Superintendent, Dr. C. Yanpo Kithan-i tepela anküp o jembiba, ta kasa sangdong nung shia lir.

Office of The Lirmen Senso Mongdang Konang Tetushi Agütsür

Lirmen Senso Mongdang (LSM) mendenti ajang tawa agiba HSLC, HSSLC aser Degree/Diploma course ajak nung kaketshirtemi takok tajung anguba atema LSM-i tenüngsang tetushi agütsür. Iba den maneni Noklangsangba Govt. High School, Lirmen nungi küm shia kaketshirtemi takok anguba asoshi kaket shisashirtem, tesayurtem aser tsüraburtem ajak dang LSM-i tepela lemsateper. Iba den alakteta topper nem tenüngsang tulu agütsür.

Moanola Longchar
Rank 11 HSLC 2021

Subject Topper : Social Science
(100) marks.

Town Hr. Sec. School,
Mokokchung

F/N: T. Limawapang Longchar
M/N: Tsukongtsüngla Jamir.



Tarutsü anogotem nunga sensosanger ajaki nenoki takok tajung bener arutsü yimla atar. Tsüngremi nenok taküm aser tarutsü wadang ajak nung moajangma.

Sd/-
(T. Medem)
President

Lirmen Senso Mongdang

Sd/-
(S. Ayangba Walling)
Secretary

Lirmen Senso Mongdang

Assam Rifles-i ayongzuka süngdong atem

Dimapur, Chiteni/July 26, 2021 (TYO): Deobarnü, HQ IGAR (North) kübok HQ 5 Sector Assam Rifles-i 'SAVE NATURE SAVE FUTURE' omen nung ajemdaker Kohima, Wokha, Phek aser Kiphire district tem nung süngdong atemba sentong ayongzuka agiogo. Iba mapatong kübok, Assam Rifles-i item district nung süngdong 14035 shi tema liasü, ta sangdong ka ajanga metetdaksü.

Asen meketa aliba libajen aser lipüküm kümzuka

yutsütsü nükjidong yur, AR-i süngdong atemba sentong ayongzük. Shilem agir ajaki social distancing aser Covid-19 temzüng nung anidaka iba maparen inyakogo.

Kasa anogo, HQ IGAR (North) kübok HQ 25 Sect AR aser Assam Rifles indang u/c units ajanga Anüolen tip Arunachal Pradesh nung süngdong atemba sentong ayonga agiogo.

Süngdong atemba tajangzük aser alima nung tzü mopung melenshia aoba dak sedakba nung ajemdaker

nübur aser sepai tem dang tekümdangtsü osang sangoktsütsü nükjidong nung iba drive ayongzuka liasü.

Libajen kümzuka ayutsü asoshi nübur ajaki tongti shilem agitsüla, ta team-i shilem agirtem ajungshia liasü.

Nüburtemi Assam Rifles ajanga ayongzükba sentong pelashishia agizükogo aser libajen wazüka aser kümzuka ayutsü asoshi tenangzükteper agi. Iba drive mapang, süngdong tapu balala 13887 shi temoktsüogo, ta kasa sangdong nung shia lir.

OFFICE OF THE MERANGKONGTSÜR TELONGJEM H.Q. MERANGKONG Dist. Mokokchung :: Nagaland

Ref No.....

Date: 26/7/21

TENÜNGSANG AGÜTSÜR

NBSE ajanga 2021 küm agiba HSLC tatidang nung Wb. Temjenzulu Yaden aser Wt. Chubasenla Imsong-er jala **Kr. Sentienla Yaden, Top 11** nung takok tulu ngutetba konang nungsang bener arutsü nung Merangkongtsür Telongjem ajanga kanga pelaba metetdaksür aser Tsüngrem tenüng asanger.

Iba den külemi shirnokisa taküm HSLC aser HSSLC tatidang nung takok tajung nguogo, nenok ajak nem tenüngsang agütsür.

Tsüngremi nenok kaketshir wadang nung maneni moajangma.

Sd/-
TIAYUNGLA
President

Sd/-
I BENDANGMENLA
General Secretary

Mirabai nem Additional Superintendent of Police mapa agütsütsü



New Delhi, July 26, 2021: Tokyo Olympics nung Silver Medal angula, Weightlifter Saikhom Mirabai Chanu, Delhi airport tonga arudang tangokba noksa nung angur.

Imphal, Chiteni/July 26

(Agencies): Manipur Chief Minister N Biren Singh-i Hombarnü, weightlifter Saikhom Mirabai Chanu nem state police department nung Additional Superintendent of Police mapa agütsütsü, ta sangdongogo. Mirabai Chanu-i tang asayaa aliba Olympics nung silver medal ka nguogo.

State sorkarisa la nem sen crore ka senpet agütsütsü ta chief minister-i ashi. Olympian shibia tetsür weightlifting 49 kg category nung silver medal nguogo, la nem Additional Superintendent of Police (Sports) mapa agütsütsü, ta

Singh-i ashi.

Manipur sorkarisa state nung yakta world-class weightlifting academy ka amenoktsü atema telemtetba agiogo, ta pai ashi.

Judoka L Sushila Devi-a constable indang rank nungi sub-inspector-i ajungkettsütsü, ta CM Singh-i metetdaksü.

Manipur sorkarisa Tokyo Olympics nung shilem agir ajak nem sen lakh 25 (asayar shia) agütsütsü sangdongogo.

Tang asayaa aliba Olympics nung Manipur nungi Chanu, Devi aser boxer Mary Kom nung densema asayar pongui shilem agidar.

Kasa mapang nung Mirabai Chanu Hombarnü linük tonga aruogo. La Indira Gandhi International Airport nung Sports Authority of India ketdangsurtem aser la pusemertemi agizüka liasü.

Osang ajanga ashiba agi, Tokyo Olympics silver-medalist Mirabai Chanu nem 49kg tetsür weightlifting tetoktepba nung gold medal agütsütsü akok. China tsür Hou Zhizhi, shibai iba category nung gold ngua liasü, la dope test atema Tokyo toktsür moi atatsü atema tetuyuba agütsüogo. Zhizhi dope test majangtetra Chanu nem gold medal agütsütsü.

Lewandowski nem German Player of the Year naroküm agütsü



Berline, Chiteni/July 26

(Agencies): Bayern Munich striker Robert Lewandowski nem Deobarnü küm anabuba atonga Germany's Footballer of the Year naroküm agütsüogo.

Journalists temi vote agütsüba sülen arishi küm 32 tain Poland nung asayar nem football magazine Kicker-i iba naroküm agütsü liasü.

Lewandowski, shibai season ka nung Bundesliga goal timtiba idaktsüba record Gerd Mueller-i küm 49 tashi bener aliba menep, pai vote 563 nungi 356 nguteta liasü.

"Iba naroküm koda tongtibang aji ni meteta lir. Iba

naroküm anguba ya tetushi tulu aser kanga pelar, kechiyong Germany nung Footballer of the Year naroküm küm ana atonga angutsüji temela masü," ta Lewandowski

Tanabuba jenjang nung Bayern Munich nungi asayar Thomas Mueller liasü, shibai vote 315 angu aser tasembuba jenjang nung Borussia Dortmund nungi asayar Erling Haaland-i vote 38 angu.

"Bundesliga asaya 29 nung goal 41 idaktsütetba atema kanga pelar. Goal paikaya idaktsütetba atema kanga pelar aser talisa ni yiruaka iba jenjang jangzüktetba ya

jangrademtsüka," ta Lewandowski-i ashi, shiba March ita temekok nung timtem adokba ajanga hopta asem masayateti liasü.

Lewandowski indang taoba manager Hansi Flick, shiba coach tem rongnung Chelsea coach Thomas Tuchel sülen tanabuba jenjang nung liasü pai Lewandowski ya, "sempet tajung aketba professional ka aser centre-forward tem rongnung tajungtiba," ta ashi.

2014 küm Bayern nung arua adenba sülen Lewandowski-i asaya 219 nung goal 203 idaktsür lir.

2020-21 season nung pai tongtibang shilem agia Bayern-i German league 31 aser Bundesliga title tekubenbuba atonga koka liasü.

Lewandowski-i career tenzüka sülen club balala aser linük tenung nungi asayaba mapang goal 500 dak tema idaktsür lir.

2020 küm pa nem FIFA's best male player naroküm agütsü aser Lionel Messi o Cristiano Ronaldo na ajateta European Golden Shoe dena ngua liasü.

England Test atema Shaw & Suryakumar na shimogo

Chiteni/July 26, 2021

(Agencies): August 4 nü nungi tenzüka England den test asaya pongu asayatsü aliba atema Prithvi Shaw aser Suryakumar Yadav na temelen shimba All-India Senior Selection Committee-i Hombarnü sangdongogo.

All-rounder Washington Sundar, fast bowler Avesh Khan aser opening batsman Shubman Gill nung yiruba ajanga iba asayamung nung masayatetsüsa kümogo.

"Sundar ball aonba temeyong nung injection ka agiogo. Ajisüaka pa imlaba dang nungi temenuba aneptsü aser pa ball monteti kümogo. Pa asayamung nung masayatetsü," ta BCCI sangdong ka ajanga metetdaksü.

"Fast bowler Avesh Khan warm-up game mezüngbuba anogo teka tabelenlen temeyong jemtsüba yiru. Temeyong X-Ray agiogo aser raksaa aliba jangaago. Pa yirur aliba anepalutsü atema mongin ka den tongtepratepogo. Pa England den asayamung nung shilem magitetsü," ta kasa sangdong ajanga metetdaksü.

"Opening batsman Shubman Gill World Test Championship final asayaba mapang tetsüng

tabelen yiru. MRI scan agiba sülen pa yirur aliba jangaago. Pa asayamung nung shilem magitetsü aser India-i meyipa aruogo," ta BCCI-isa metetdaksü.

Kasa mapang nung wicketkeeper-batsman Rishabh Pant COVID-19 tashidak menar aliba anepogo. BCCI Medical Team-i temelaba agütsüba sülen pa taruba Test asayamung atema renemshi tenzükogo.

Bowling coach B. Arun, Wriddhiman Saha aser Abhimanyu Easwaran nungera London nung self-isolation mapang tembangogo aser Durham nung India team den longjemogo.

India squad: Rohit Sharma, Mayank Agarwal, Cheteshwar Pujara, Virat Kohli (Captain), Ajinkya Rahane (vice-captain), Hanuma Vihari, Rishabh Pant (wicket-keeper), R. Ashwin, Ravindra Jadeja, Axar Patel, Jasprit Bumrah, Ishant Sharma, Mohd. Shami, Md. Siraj, Shardul Thakur, Umesh Yadav, KL Rahul, Wriddhiman Saha (wicket-keeper), Abhimanyu Easwaran, Prithvi Shaw, Suryakumar Yadav

Standby players: Prasidh Krishna, Arzan Nagwaswalla.

Tokyo 2020: Sharath Kamal tasembuba round-i iogo



tsür Manika Batra-a tetsür kija asaya nung Austria tsür Sofia Polcanova-i tsükdaktsüogo. Hombarnü table tennis tetsür kija asaya tasembuba round nung Sofia Polcanova-i 4-0 agi Batra madak takok ngua liasü.

Kasa asayamung nung tebur badminton tarep asaya nung Satwiksairaj Rankireddy aser Chirag Shetty na Indonesia nung world number one tarep Marcus Gideon Fernaldi aser Kevin Sanjaya Sukamuljo nati kokogo.

Gideon aser Sukamuljo nati iba asaya 13-21 12-21 agi minute 32 nung koka liasü. Satwiksairaj Rankireddy aser Chirag Shetty na tang agi tekubenbuba Gideon aser Sukamuljo nati tsükdaktsüogo.

Group A asaya nung Sukamuljo aser Gideon na temaba jenjang nung lir aser Satwik aser Chirag na tanabuba jenjang nung lir. India nung tarep yagi England nung Ben Lane aser Sean Vandy na akoktsüsa akümtsü. Tenata Indonesian nung tarep yagi kokogo.

World number three Chinese Taipei nung tarep Lee Yang aser Wang Chi-Lin nata Group A nung densema lir aser tenati England team kokogo.

Chiteni/July 26, 2021

(Agencies): India nung rongnungi table tennis asayar tejen A Sharath Kamal-i tebur kija asaya tanabuba round nung Portugal nung asayar Tiago Polonia koka tasembuba round-i iogo, ajisüaka Sutirtha Mukherjee bo Portugal nung asayarsa Yu Fu-i tsükdaktsüogo.

Arishi küm 39 tain asayar Sharath-i 2-11 11-8 11-5 9-11 11-6 11-9 agi Tiago madak takok angu. Tena tsingda minute 49 asayaa liasü. Pa taruba asaya China nung defending champion Ma Long den asayatsü.

Tanga asaya ka nung Yu Fu-i 3-11 3-11 5-11 5-11 agi Sutirtha tsükdaktsü liasü.

Kasa mapang nung India

BILEMDANGANG

"Teyaritep makaba lokti rajang akümtsü."